

**„Ratovi 1990-tih u učionici –
 Kako podučavati podijeljenu historiju za zajedničku budućnost“**

Udruženje nastavnika i profesora historije/istorije/povijesti EUROCLIO HIP Bosne i Hercegovine realizira projekat „Ratovi 1990-tih u učionici – Kako podučavati podijeljenu historiju za zajedničku budućnost“. Cilj projekta je podići svijest o sjećanju i pomirenju u Bosni i Hercegovini, promovirati vrijednosti mira potičući svijest o promoviranju zajedničkog materijala i pristupa izučavanju tema o ratovima 1990-tih. Projektnim aktivnostima nastojimo doprinijeti uspješnijem podučavanju o ratovima 1990-tih u Bosni i Hercegovini, opremiti i obučiti nastavnike korištenju historijskih izvorima i dodatnih materijala u nastavi historije, ohrabriti nastavnike da kritički promatraju historijske događaje i ličnosti kroz proces podučavanja o ratovima 1990-tih te omogućiti nastavnicima da učestvuju u procesu suočavanja sa prošlosti kreirajući dijalog u cilju gradnje mira i dekonstrukcije sadašnjih i sveprisutnih stereotipa.

Podučavanje osjetljivih tema iz nedavne prošlosti je dosta teško i nastavnici se često ne osjećaju spremni da se s time suoče. Svjesni da su u posljednje dvije godine ove teme predstavljene u svim nastavnim programima u Bosni i Hercegovini, a da nastavnici nisu prošli odgovarajuću obuku željeli smo dati prostora ovim temama i otvoriti dijalog o njima. U vezi sa izazovima podučavanja o ratovima 1990-tih nastojimo iznaći mogućnosti prevazilaženja brojnih prepreka i promovirati ideje kritičkog razumijevanja. U ovakvom pristupu najvažnija prepreka su mitovi, predrasude i stereotipi. O njima želimo govoriti, njih želimo ispitivati, njih želimo dekonstruirati koristeći se multiperspektivnim pristupom i kombiniranjem izvornih materijala prilagođenih uzrastu i interesu učenika.

Projektne aktivnosti obuhvataju analizu udžbenika historije za osnovne i srednje škole iz Bosne i Hercegovine, Hrvatske i Srbije i lekcija posvećenih ratovima 1990-tih. Rezultati analize biće publikovani u vidu članka dostupnog na web stranici Udruženja. Također u planu je organiziranje trening seminara za nastavnike iz Bosne i Hercegovine na kojem će biti predstavljeni različiti primjeri obrade tema o ratovima 1990-tih uz korištenje historijskih izvora, vizualnih i pisanim materijala te predstavljeni rezultati urađene analiza udžbenike. Iskreno se nadamo da ćemo ovakvim pristupom ohrabriti nastavnike historije iz Bosne i Hercegovine da usvoje profesionalne standarde i da se distanciraju od ličnih i emotivnih stavova u cilju promoviranja dijaloga za zajedničku budućnost s naglaskom na vrijednosti mira. Projekat se implementira uz finansijsku podršku **REKOM-a** (Regionalne komisije za utvrđivanje činjenica o ratnim zločinima i drugim teškim povredama ljudskih prava počinjenim na teritoriji nekadašnje SFRJ od 1. januara 1991. do 31. decembra 2001.) u okviru programa **Aktivizam civilnog sektora za pomirenje u regionu bivše Jugoslavije**.

